

Талапты азамат

Қасиетті Торғайымызды еске алғанда ақын ағамыз Қадыр Мырзалиевтің «Мен қазақпын, мың өліп, мың тірілген» деген өлең шумағы еске оралады. Қазақ халқының басынан өткен қасірет, зұлматтар, сонымен қатар жасампаз өмір де Торғай елін айналып өтпеген. Ең бастысы халқы рухын сақтап, қиындыққа бас имей, өсіп-өркендеп, қайта түлеп отырған.



Осы қасиетті жерден елін қорғаған ерлер, жерін түлеткен асыл азаматтар әр дәуірде, өз заманында халқына адал қызмет жасап, артында өшпес ізі, салған жолы, қажырлы еңбегі, елінің тарихы болып халықының жадында сақталып келеді. Кенесары хан мен оның соңынан ерген Жәуке, Иман, Қошқар батырлар, Әбдіғаппар хан мен Аманкелді Имановтар өмірлерін елінің тәуелсіздігі үшін күреске арнады. Одан бергі заманда Торғай жеке облыс болып құрылғанда, халқымыздың біртуар перзенті, көрнекті мемлекет және қоғам қайраткері Еркін Әуелбеков осы елге көп еңбек сіңіріп елдің жүрегінде мәңгіге қалды. Менің бағымға қарай Еркін Нұржанұлымен қызметтес болдым. Өнеге тұттым. Сондай болуға тырыстым. Торғай облысында соның ішінде Қима, Жақсы аудандарында аудандық комсомол комитетінің бірінші хатшысы, Амантоғай, Арқалық аудандарында аудан ауыл шаруашылығы басқармасының басшысы, Аманкелді ауданында «Қараторғай» кеңшарының директоры және аудандық партия комитетінің бірінші хатшысы қызметтерінде, еліміз тәуелсіздік алған кезеңде торғай облысы әкімінің бірінші орынбасары, Президент аппаратында, Ақмола, Батыс Қазақстан

облыстарының өкілі қызметтерінде болдым.

Менің өмірімде ерекше орын алған ел - Аманкелді ауданы еді. «Қараторғай» кеңшарының директоры, Аманкелді ауданының бірінші басшысы болған 10 жыл уақыт - өміріме үлкен сабақ болды. Қазақтың тілін, ділін, салтын, дәстүрін сақтаған елдің қайнаған ортасында көптеген ел құрметтеген елжанды асыл азаматтармен, іскер, намысты жастармен араластым, қызметтес болдым. Қай қызметте жүрсем де білімді, білікті, сыннан өткен, жалын-даған жастардың болашағына жол ашып, тағдырына араласып отырдым. Солардың ішінде орны бөлек азаматтың бірі - Жалғасбек Сүлейменов еді.

Міне, бүгінгі күні Жалғасбек Маратұлы Сүлейменов бауырым да - 60 жасқа келіп отыр. Өмірбаяны да көз тартарлық: еңбек жолын комсомол жас шопандар бригадасында бастап, Қазақ Мемлекеттік университетінің журналистика факультетін бітіріп, «Торғай таңы» газетінің тілшісі, Аманкелді аудандық «Тың шұғыласы» газетінің бөлім басшысы, одан көп ұзамай өзінің алғыр, шешімді, тиянақты мінезімен жастардың сеніміне

еніп, аудандық комсомол комитетінің бірінші хатшысы болып сайланды. Ұйымдастырушылық қабілетімен жастардың ұйытқысы болды. Осы жігіттің көзінен жанып тұрған от, тайсалмайтын батылдық, елге жеткіш бола алатын қабілетін көріп, «Коммунизм жолы» кеңшарына бастауыш партия ұйымына хатшы қызметіне ұсындым. Кеңшардың директоры аудандағы беделді, елге сыйлы Әбсадық Нұржанов болатын. Алғашында жас азаматтың аяқ алысын назарда ұстап, бағыт-бағдар, ақыл кеңесімді беріп бақылап жүрдім. Еңбекқор, іскер, жаңалыққа жаны құмар азамат кеңшар директорының тілін тауып, өзін директормен тең ұстап, ойын жүзеге еркін асырып жүрді. Ауылда көптеген игі бастамалар көтерді. Коммунизм жолы кеңшары аудан шаруашылықтарының ішінде өнегелі істердің, тың бастамалардың жаршысы болып жүрді. Ауылдың ажарын ашып, сән беріп тұратын, халыққа қажетті әсем емхана, тойхана, тері илеп тон тігетін шағын кәсіпорын ашылып халыққа қызмет жасап тұрды. Сол қатарда кеңшар кеңсесі, оны қоршаған зәулім биік теректер

жайқалып алыстан көз тартып тұратын. Теректердің ортасында қолын созып жол көрсетіп Лениннің ескерткіші тұрды. Ауылдың тазалығы мен көркеюіне жас хатшы ерекше мән беріп, жиі аралап, кемшіліктер көрсе дереу түзеттіріп, күш қажет ететін шаруаларды директорға айтып істеткізетін. Жалғасбекке қатысты мына бір уақиға есіме түсіп отыр. Бір күні құм бұрқыраған қатты дауыл болды. Жалғасбек күндегі дағдымен, ерте тұрып, ауылды аралап шығып, кеңсе алдындағы Лениннің басына терек құлап, төбесін опырып жібергенін байқайды. Енді оны қалай қалпына келтіруді ойлап тұрғанда, қасына келіп қалған директор Әбсадық Нұржанұлын көріп:

- Әбеке, байқаған шығарсыз, бір терек құлап атамыздың басын жарып кетіпті. Соны қалай жөндейміз деп ойланып тұрмын! - дейді.

- Оны ойлайтын ештеңе жоқ. Басына кепка кигізе салмаймыз ба?! - деп Әбеке қалжыңға басып хатшысын күлдіріп алып: - Оған қам жеме, қазір-ақ қалпына келтіреміз! - дейді. Деруу орынбасарын шақыртып алып бәрін орнына келтіртеді.

Жастың аты - жас. Жалғасбек көп ізденіп, үнемі жаңа идеялар ұсынып, директорымен бірігіп, Қарасу ауылына көптеген жаңалықтар енгізді. Кеңшардағы жаңалықтар мен игі істерді аудандағы шаруашылық басшыларынан шақырып, семинар өткізіп, олардың намысын оятып, мынталандырып, ізденіспен жаңалыққа ұмтылуға жұмылдырып отырды. Оны көрген басқа кеңшарлардың басшылары да намысқа тырысып, еңбектеніп жатты.

Жалғасбекті шаруашылыққа жібергенімің дұрыс болғандығын түсіндім. Үш жылдан кейін аудандық «Тың шұғыласы» газетіне редактор қызметіне ауыстырылды. Өтір, ақылды, жігерлі жігіт әрі қарай өз еңбегімен: Торғай облыстық партия

комитеті бірінші хатшысының кеңесшісі; Халық депутаттары облыстық Кеңесі төрағасы кеңесшісі; Торғай облысы әкімінің баспасөз хатшысы; «Торғай таңы» газетінің бас редакторы; Солтүстік Қазақстан, Ақмола обл «РТРК «Қазақстан» филиалдарының директоры; «Көкшетау» газетінің бас редакторы; «Көкше - Media» ЖШС директоры қызметтерін атқарып келеді. Қызмет жасаған жерлерінде абыройлы болып, жұмыс істеп кеткен ұжымдарынан тек жақсы лебіздер ғана естіп келміз. Жалғасбек Маратұлы - тұрғырдан түсіп тұрған жоқ, күш-жігері таусыған шағында. Егемен елімізді өркендетке, қоғамымызды мәдениетке жеткізуде толағай табыстарға жетіп, ұрпағымен мағыналы, бақытты, гүмұрлы болуын тілеймін.

Аманкелді ауданында бірінші басшы болған кездерімде көптеген іскер жастар: Гаухар Нұрсейітова, Арман Шамшин, Шәрипа Әлшурина, Майраш Едресова, Дыбыс Қасымқызы, Тұрсынғали Толыбаев, Роза Байзақова, Хамитбек Мұсабаев, Жақсылық Алпысбаев, Сағидолла Әбжанов сынды жігіттер мен қыздар жауапты жұмыстарға тағайындалды. Бүгінгі таңда олардың еңбекпен шыңдалып, халықтың сеніміне енген тұлға болып жүргенін көріп, көңіліме медет тұтамын.

Нарықтық қоғам атанған жаңа заманда, билік басына жаңа леп, жаңа іскер жастар келіп, әкелерінің бастаған істерін одан ары жалғастырып, Аманкелді елінің туын жықпай, облыстағы үлгілі ауданның бірі болып отыр.

Ауданымызға әр келген сайын жақсы істер мен жаңалықтарды көріп риза болып қайтамын. Аудан халқына, басшыларына - ел түлеп, береке-бірлікте, іргелі, бақытты, дәулетті ел болып мәңгілік жасасын деп тілеймін!

Аманкелді САДЫРБЕКОВ,
қоғам қайраткері.

